

Qualchi volte il soreli, plui furbo che tal lor païs, in jenfri lis cretis de montagne, al vignive a cucális prime che vessin finît di svuatarâsi; o la ciampane di san Nicolò 'e sunave madîns plui a buinore del solit: e alore, vaiulints, 'e scugnivin tornâ indaùr. Ma plui di spès, mitût tal sen un mazzèt di violutis rossis 'e svolavin tal pradissît de Tence, indulà che in gran ligrie 'e jerin za a spietâlis lis striis ciargnelis e chês del Friul.

Su la spècule di Ciàbie, sun ché montagne verde e rimpinide che ciale parsore Cedarcis e che fâs ciantòn tra la Bût e il Ciarsò, si podeve vedêlis in comarèz, a balá insieme e a bussâsi còme tantis sùrs.

Indulà che tociavin lis còtulis e chei pidùz lizerîns, il prât al sflurive di bote; e tal indomàn dut il ciadìn de Tence al pareve piturât a strichis rossis, turchinis, blancis e zalis, a fuarze di pan-purcìn, lis e campanelutis che cuviarzèvin la tiare.

E disin che ance sar Silvèrio, chel danât che al piche la montagne rèt il Moscardo, al montave sul so grèbano; e par gust di vedêlis, al meteve il capiel vert e la gabane colôr di rose.

Su l'ore di misdì, par rinfres' ciális, al jevave sù dal mar un aiarin zintil, e, traversade la planure al marciave a cavalòt de Bût, spacànt lis alis blancis mormuiànt e bussànt a une a une lis ondadis che i vignivin incuintri.

Cumò, tal ciadìn de Tence no balin plui lis striis. Inveze sar Silvèrio al piche plui che mai, la joibe, e quant che l' à fat un gran grum di clàs, al ju sdrume jù te Bût e in forme di purcît al torne sù a rimá. La ciampane di san Nicolò, sdrondenade dal vint, cumò 'e sune a miezegnòt; e chei bòz malinconics e misteriôs 'e parin il sglinghinà di une ciadene. Lis nestris striis, spauridis, 'e fuin a scuîndisi daùr i grèbanos del Cuc o sul Ciaul o in jenfri lis Palis secis de Serenate. Chês di Germànie, vistudis di neri, cu' lis strezzis disfatis jù pes spàdulis, sintadis sul confin, 'e vain l'antighe amicizie piardude.

CATERINA PERCOTO.